

1 Peto

Peto Malele Epapua Kakaua Auga

1 ¹Lau Peto, Iesu Kristo ega apostolo au aga'o. Lau malele i'ina lapapua oi Deo ekinanimi papiaumi, agofa'ai ago a'ina aumi koa i'opomi, okani okaoka, olao Pontus, Kalatia, Kapadosia, Asia, ke Bitinia ago'iai oague aumi eemiai laulaisa. ²Ke oi aumi Deo Ama muni kapa'ina agemia elogo auga ega logoai, ke Deo ega Spiritu papiau alo'i epalolofania auga ega pinaugai oi ekinanimi. Ega koa oi Iesu Kristo aina foafia, ke Iesu Kristo ifagai oi emi apala feikulai'i eoma.

Lau lamegamega ega koa Deo ega gafegafe akaiki'a, ke gagao fou alomi fepapogua, fepafakaua laoma.

Afia'ama Ageka Aoniamo Auga

³Deo, i'a a'a Lopia Iesu Kristo Ama auga, tenkiu akaiki'a amapenia, ke amaaui afagaina! Isa ega guani akaiki'a ipaumagai i'a mauni mamaga epenii'a. Ega koa i'a Iesu Kristo maeai emaunimue auga faagagai, afia'ama ageka aoniamo auga faafia eoma. ⁴Ke ega koa Deo oi kapa'ina foafia eoma ufai eoge eka auga foafia eoma. Ke ega'ina kapa auga, afaelifu, afaeofu, ke laa'i afaemia. ⁵Oi emi pako'a faagagai Deo ega isapuai oi age'imaimi mo agelao, Isa papiau ma'oai kania'i ageagamauga auga kinagai kai. Ke Isa papiau ma'oai kania'i feagamauga auga epafua ekae, kina fuagai kai agepafokia. ⁶Ega'ina kainai pau oi kina oisomo mo alogai i'opo i'oi'i i'oi'iai alomi fekiekie mo ganinagai, oi alomi egama alogaina. ⁷Ke oi emi pako'a auga gold afa eka'egaina. Papiau gold fekapula keoma puo, loai iuma emia mo ganinagai, afaeka aoniamo laa'i agemia. Kai i'opo i'oi'i i'oi'i oi eemi kefai ega koa oi emi pako'a kapula ipauma femia. Ke Iesu Kristo ageapafoki pugu aisama, oi emi pako'ai feau afagainimi, au akaiki'ami fepamiaimi, ke isapu eaea akaiki'a fepenimi laoma. ⁸Ke oi Iesu Kristo aloisa mo ganinagai, oi alomi ko'agai

isa anina oani. Ke pau isafa isa aloisa mo ganinagai, oi isa opako'ania, ke emi alogama epagai alogaina, agaifa'opo afaekaina. ⁹Gome oi emi pako'a fuagai kapa'ina foafia auga, oi lalaumi feisagamau auga pau oafia.

¹⁰Ufainagai profeta papiau kania'i isagamauga ega'ina auga fougalo'i ko'agai oko kekapunia, ke oko kegalogo felo keoma. Ke isa Deo ega gafegafe akaiki'a ega'ina oi eemi agemai auga fougakeifafoua.

¹¹Ke isa Iesu Kristo kina kapagai agekiekie, ke ala agekiekie oma, ke agekiekie afegai Deo ala ageoma isa au akaiki'a agepamia auga ke'opoisa kegapulaisa keoma. Ega'ina auga, ega'ina kapa'i ma'oai akemia koa kai, Iesu Kristo ega Spiritu isa alo'iai eagu auga kapa ma'oai isa maa'iai epafokia efua. ¹²Kai profeta ega'ina kapa'i keifafou'i auga, isa ifo'i fau'iai akeifafou'i kai, oi faumiai keifafou'i auga Deo epalogoni'i. Ke ega'ina kapa'i ufainagai profeta keifafou'i auga, pau oi maamiai keifafou'i. Ega'ina auga Deo ega Spiritu ufai eulaisa emai auga ega isapuai papiau pau oi maamiai iifa faunina Iesu fougakeinogonia. Agelo isafa alafai kegaoma ega'ina kapa'i kegaisa'i, oko'i kegalogo keoma.

Deo Eifani'i Alo'i Felolofa Eoma

¹³Ega puo oi ifomi fopafuaimi foagu, laomai felo'i fokapa'i. Ke ifomi fo'ima feloimi. Ke Iesu Kristo ageapafoki pugu aisama, gafegafe akaiki'a oi agoafia auga eegai emi afia'ama fofouga fooge. ¹⁴Ke imoi ina'i ama'i aina'i keafia koa i'opoga, Deo aina foafia, ke Iesu Kristo alologonia alogai, alomiai laomai apala'i mo omaani'i au'i lao'i mai'i kai'iai folopea. ¹⁵Kai oi eifanimi auga alo elolofa koa i'opoga, kapa ma'oai agokapa'i alogai, alomi lolofagai fokapa'i. ¹⁶Gome Deo ega iifa pukagai iina eifa oma: "Oi alomi felolofa, gome lau alou elolofa,"^a eoma.

¹⁷Ke oi Deo kai aga'o afegai aeaulao kai, papiau aga'o aga'o kapa'ina kekapa auga kainai mo afa epeni'i auga oifaga Amami ooma. Ega kainai oi inae agofa'ai au a'imi koa i'opomi omia oague alogai, Deo fomani'iaina. ¹⁸Gome kapa aga'o afakepagama auga aguga, oi ufumi apami ee'iai oafia oagu. Oi ega'ina agugai oaguega kai, Deo oi afami eogeisa ega'ina agugai epapealaimi auga ologo. Kai Isa oi kapa laa'i akemia au'i kapa'iai, silifai, o goldai afami aeogeisa. ¹⁹Kai Iesu Kristo, sipi gauga faagagai isafa, ke kua afuga aga'o laa'i auga ifa kapa akaiki'a ipauma auga faagagai e'afaimi auga ologo felo. ²⁰Deo agofa'a aepagama koa kai isa ekinaga. Kai Deo ifo ega logoai oi faumiai i'ina kina fua'i alogai isa epaapa fokia. ²¹Oi isa faagagai Deo opako'ania. Deo auga isa maeai epamaunimue, ke au akaiki'a epamia. Ega puo oi emi pako'a ke emi afia'ama Deo eegai ooge.

²²Ke oi pau Deo ega iifa muninai opea kainai, oi alomi elolofa. Ega koa oi alomi ko'agai aami akimi Kristiano papiau'i ani'i oani. Ega koa

^a 1:16 Leviticus 11:44-45; 19:2; 20:7

i'opoga mo, foisa felo oi aga'o aga'o alomi ko'a ipaumagai ke alomi fofougai animi foani. ²³Gome oi mauni mamaga oafiia auga, au oga emae auga faagagai aloafia. Kai Deo ega iifa, au oga maaga mauni ekae afaemaemae, ageka aoniamo auga faagagai mauni mamaga oafiia. ²⁴Gome Deo ega iifa pukagai iina eifa oma:

“Papiau aumauni imau'i auga mukimuki koa i'opoga,
ke papiau aumauni iisa'i felo'i ma'oai auga ago alo kaikai'i koa
i'opo'i.

Mukimuki eogogo, ke kaikai ke'ualai.

²⁵ Kai Lopia ega iifa auga ekae aoniamo.”

Aisaea 40:6-8

2 Ke Deo ega iifa ega'ina auga fougai oi maamiai keinogonia. ¹Ega puo kapa ma'oai apala'i ipauma'i au'i, pifoge ma'oai, ke pifogeai papiau felomi koa okagakaga auga laoga maina, ke pikupa, ke pikafa i'oi'i i'oi'i ma'oai fooge me'e'i. ²Kai imoi mama'i kemauni au'i u'u anina keani alogaina koa i'opo'i fomia, Deo ega iifa u'u ko'a ipauma auga koa i'opoga alomi ko'agai anina foani. Ega koa u'u ega'ina faagagai fouki felao Deo kaniami ageagamauga kinagai kai. ³Ke oi Lopia Iesu Kristo ega felo gamuga ooponia koa aisama, oi ega'ina fokapa.

Kepo Ekae Aoniamo Auga Ke Deo Ekinani'i Papiau'i

⁴Ke oi Lopia ega'ina kepo ekae aoniamo, papiau keumakalaina kai Deo ekinaga maagai kapa akaiki'a ipauma auga eega fomai. ⁵Ke oi isafa kepo ega'ina ekae aoniamo koa i'opoga fomia, Deo oi fepapinauganimi, Isa ega e'a fepaapa. Egae oi Deo ega sakedote au'i koa fomia, Iesu Kristo faagagai Deo pipeni anina eani koa i'opomi fomia, ifomi imaaumi Deo fopalao penia. ⁶Gome Deo ega iifa pukagai iina eifa oma:

“Amoisa, Lau kepo aga'o lakinaga, ke uu'u kapula ipauma kiugai
eapa, kapa akaiki'a auga
Sion ikugai laogeisa.

Ke kaisau isa epako'ania auga, afakepapameagaina,”

eoma.

Aisaea 28:16

⁷⁻⁸Ega puo oi kepo ega'ina opako'ania aumi, kepo ega'ina oi eemiai auga kapa akaiki'a. Ega'ina auga Deo ega iifa pukagai iina eifa oma koa i'opoga mo emia:

“E'a ipaapa au'i kepo keumakalaina auga,
kepo ega'ina pau e'a ega'inagai kiuga uu'uuga kapula ipauma
emia,”

eoma.

Sam 118:22

Kai kaisau kepo ega'ina akepako'ania au'i fou'i Deo ega iifa pukagai iina eifa oma. Ega'ina kepo auga:

“Kepo aga'o papiau e'i keaga ekaisapua ife'i ke'anina auga,
ke fopa aga'o papiau epa'ualai'i auga,”

eoma.

Aisaea 8:14

Deo ega iifa pukagai eifania koa i'opoga, isa ega'ina kepogai ife'i ke'anina, gome isa Deo ega iifa muninai akepea. Ega'ina auga Deo isa fau'iai kapa'ina ekapaisa ekae auga, isa faaga'iai emia.

⁹Kai oi auga, Deo ekinanimiti papiaumi. Ke oi sakedote, Deo, Kin ega pinauga okapa aumi. Ke oi Deo ega ago papiaumi, ke Deo apuga omia. Ega koa Deo oi uminagai eifalaimi elaoainimi Isa ega eaea felo ipaumagai epakokoimi auga isau afagaina foifafoua eoma. ¹⁰Ufainagai oi auga Deo ega papiau alomia. Kai pau auga oi Deo ega papiau omia. Ufainagai oi Deo ega guani aloafia. Kai pau auga oi Isa ega guani oafia efua.

¹¹Ekefa'auagai, lau oi i'ina agofa'agai, ago i'oina aumi, ke au a'imi koa i'opomi oague aumi magogo kapula lapenimi. Ega koa papiau aumauni imauga kapa'ina apala emaaga, oi lalaumi fou kepipaini auga fomunia. ¹²Oi Deo akepako'ania papiau'i epo'iai oague alogai, agu felogai foagu. Ega koa isa oi laomai apala okapa keoma keifa apala penimi mo ganinagai, isa oi felo okapa auga fekeisa, ke Iesu Kristo agemai i'a ageisa'a kinagai aisama, isa Deo au akaiki'a fekepamia laoma.

Isapu Keafia Au'i Aina'i Foafia

¹³Papiau epo'iai isapu keafia papiau ke'ima'i au'i aga'o aga'o auga Lopia faugai oi ifomi ega'ina au'i aina'i foafia. Ega'ina au'i auga, kin au akaiki'a'i ma'oai kania'iai auga. ¹⁴Ke kin kafana eulaisa papiau laomai apala'i kekapa'i au'i afa apala kepeni'i, ke papiau laomai felo'i kekapa'i au'i afa felo kepeni'i au'i. ¹⁵Gome Deo ega logo auga, oi laomai felo fokapa, ega koa kafo'o papiau'i oi akelognimi kai keifa apala peni aagenimi mo au'i ake'i foafuga eoma. ¹⁶Deo agogai auga oi kapa ma'oai agokapa'i agekaina. Kai oi Deo agogai kapa ma'oai agokapa'i agekaina auga laoga maina folopapinaugania, laomai apala'i folomoka'i. Kai oi Deo ega pinauga aumi koa foagu. ¹⁷Ke papiau ma'oai au akaiki'a'i fopamia'i. Ke alomi ko'agai aami akimi pako'a au'i ani'i foani. Deo fomani'iaina, ke kin auga au akaiki'a fopamia.

¹⁸Ke oi kala'afi aumi, oi kapa ma'oai agokapa'i alogai, ke'imaimi au'i fomani'iaini'i ke aina'i foafia. Ke ega'ina agokapa alogai, keopolanimi ke ke'ima feloimi au'i mo faaga'iai ega'ina folokapa. Kai eemiai kefa'i'i akekapa feloimi au'i isafa faaga'iai ega koa fokapa. ¹⁹Gome au aga'o Deo eopolaga kainai, aufalao aga'o isa eegai laomai felo aekapa puogai ekiekie mo ganinagai, gamuga mo ageopo ageafiapia mo auga, Deo isa felo ikapa auga ageoma. ²⁰Kai oi laomai apala lokapaisa kainai, keaunio kai oi kiekie ega'ina gamuga mo loopo loafiapia mo koa aisama, kapa aga'o felo oi faagamuai afaemia. Kai oi laomai felo lokapa kainai faagamu kepakiekie, ke oi ega'ina kiekie gamuga mo aloopo aloafiapia mo koa

aisama, Deo maagai ega'ina auga felo ageoma. ²¹Ega'ina puogai Deo eifaniami, gome Iesu Kristo oi faumiai ekiekie. Ke isa ega koa ekapaisa, oi isa iisa mo fo'opo auga keagaga epakiniami. Ega koa oi isa ife afugai mo fopea eoma. ²²Isa laomai apala aga'o aekapaisa. Ke isa akegai pifoge aga'o akekapulaisa. ²³Ke papiau isa eegai keifa apala aisama, isa e'i iifa afa aeogeisa aeifa apala peni'i. Ke papiau isa faaga kepakiekie aisama, isa iifa aga'o aeifania aepamani'ini'i. Kai isa ifo elogaina, Deo afa felogai epipeni auga eega elao. ²⁴Isa ifo imaugai kolotiai i'a a'a laomai apala'i epuai'i. Ega koa i'a laomai apala'i ee'iai famae kai, alo opai agugai faagu eoma. Ke isa faaga keau kanini'i auga kainai oi Deo maagai felomi omia. ²⁵Gome ufainagai oi auga sipi keaga i'oina keafia au'i koa omia. Kai pau auga omue omai Deo Sipi I'ima auga, ke lalaumi e'ima auga eegai.

Au Papie Fou

3 ¹⁻²Ke kala'afi isa ke'ima'i au'i aina'i keafia koa i'opoga, oi papie aumi, akafami aina'i foafia. Ega koa oi papie kapami akafami Deo ega iifa akepak'o'ania au'i isafa oi emi laomaisai iifa aga'o aloifania komo mo ooma, ke oi Deo omani'iaina, ke alomi elolofa auga fekeisa. Ke oi emi laomaisai isa fola'a pagaini'i laoma. ³Ke oi iisami felo amopamia agooma koa aisama, oi faagami afe folopakaikaisa. Ega'ina auga oi fufumi opakaikaisa kapa'i ke tepole, o ou'ou goldai kekapa'i au'i, ke afemi tiapu'i felo'i ipaumagai folokaikai. ⁴Kai oi alomi fopakaikaisa. Ke oi alomi iisa felo ega'ina auga, Deo maagai papiau gagafe'i mo eafia, ke komo mo eoma auga, ke alomi kaikaina ega'ina auga laa'i afaemiamia. Ke ega'ina auga Deo maagai kapa akaiki'a ipauma. ⁵Gome ufainagai keagu papie'i alo'i elolofa au'i, ke Deo eegai e'i afia'ama keoge au'i auga, ega koa kekapaisa alo'i kepakaikaisa. Ke isa ifo'i akafa'i aina'i keafiia. ⁶Ke ega koa kekapaisa auga, Sara akafa Abraham aina eafiia, ke eifaga ega lopia eoma auga koa i'opoga mo kekapaisa. Oi kapa'ina felo auga mo agokapa, ke kapa'ina mo fekemia mo ganinagai, afolomani'i akafami aina'i agoafia paisa koa aisama, oi Sara gauga papiemi, Deo gauga ipaumami.

⁷Ke oi au aumi, papie oi eemiai kekapa koa i'opoga, oi akafami fou oague alogai, oi isafa kapa'ina isa ee'iai okapa auga foopola felo kai fokapa. Ke oi isa fopalopiani'i. Ke ega'ina okapa alogai, oi akafami keapoke akekapula au'i koa ee'iai fokapa, ke Deo ega gafegafeai agu pagai maunina pipenina epipeni auga, isa oi fou kaimialao agoafia auga koa i'opoga laoga maina ee'iai fokapa. Ega koa kapa aga'o oi emi megamega keagaga faekaisapua.

Laomai Felo Okapa Kainai Okiekie Auga Fougaa

⁸Ke nini'ani ega'ina laifani'i fuagai auga, oi ma'oai aga'o aga'o alomi aga'omo femia. Ke aga'o aga'o emi kiekie fopua'i. Ke aami akimi koa

alomi ko'agai aga'o aga'o animi foani. Ke aga'o aga'o guami foania, ke ifomi e'elemi fopamiaimi. ⁹Ke aufalao aga'o oi eemiai apala ekapaisa koa aisama, oi isa afa folopenimue eegai apala folokapa. Ke aufalao aga'o oi eifa apala penimi koa aisama, oi isa ega iifa afa folopamue, foloifa apala penia. Kai Deo kapa felo'i isa agepenia auga maagai foifania, foifa felo penia. Gome oi ologo Deo oi eifanimi auga i'ina puogai eifanimi, ega koa Deo kapa felo'i oi fepenimi eoma auga foafi'i eoma. ¹⁰Gome,

“Kaisau alo ko'agai ifo ega agu maunina anina eani auga,

ke anina eani kina felo'i feisa'i eoma auga,

mala fe'ima malagai iifa apala'i aga'o faepealai.

Ke fifina isafa fe'ima, fifinagai pifoge iifa'i aga'o fakepealai.

¹¹ Isa laomai apala femunia ke laomai felo fekapa.

Ke isa gagao fekapuga muninai fepiau.

¹² Gome Lopia maaga auga,

papiau Isa maagai alo'i opaina au'i ee'iai ekae.

Ke Isa aina auga, isa e'i megamega eegai ekae.

Kai Lopia kaisau laomai apala'i kekapa'i au'i emuni'i.” *Sam 34:12-16*

¹³ Ke oi alomi ko'agai laomai felo muninai amopea ooma koa aisama, kai aga'o oi afaepalifuimi. ¹⁴ Kai oi felo okapa auga puogai papiau oi fekepakiekieimi mo ganinagai, Deo oi kapa felo'i epeniimi efua. Ke oi isa e'i pamani'i folomani'iaina ke foloopopo isafa. ¹⁵ Kai alomia Iesu Kristo auga Lopia alo elolofa auga fopamia. Ke aufa kina fofua foagu, papiau aga'o aga'o oi emi afia'ama oafiia auga gome afekepa'aniaina koa aisama, e'i pa'ani afa fopenimue'i. ¹⁶ Kai ega'ina agokapa alogai, Deo maagai kapa'ina felo auga mo foopolaga fokapa, papiau gagafe'i mo foafia, ke au akaiki'iai fopamia'i. Ega koa papiau kapa'i oi Iesu Kristo faugai laomai felo'i okapa'i au'i ee'iai keifa apala, ke kepaagu fofou aagenimi mo au'i, ega'ina meagaina fekepa'aua laoma. ¹⁷ Gome oi felo okapa kainai Deo ega logoai okiekie koa aisama, ega'ina auga Deo agogai felo ipauma. Kai oi apala okapa kainai Deo ega logoai okiekie koa aisama, ega'ina auga Deo agogai apala ipauma. ¹⁸ Gome Iesu Kristo alo opaina auga, oi alomi opaina laa'i aumi emi laomai apala'i fau'iai emae aga'onia mo, ega koa isa oi Deo eega felaoainimi eoma. Isa imauga auga keaupugua kai, Deo ega Spiritu ega isapuai isa emaunimue pugu. ¹⁹ Ke Spiritu ega'ina ega isapuai isa elao papiau e'i spiritu ketipula au'i maa'iai einogo. ²⁰ Ega'ina au'i auga ufainagai Noa eagu kina'iai sikuna ekapaisa alogai, papiau Deo aina akeafia au'i. Kai Deo alo isa ee'iai eafiapia mo. Ke Deo sikuna ega'inagai papiau oisomo mo, au'i imagea gua mo fei eegai kania'i eagamauga. ²¹ Ke fei ega'ina auga, pau oi feisai baptismo oafia, ke Deo oi isafa kaniami eagamauga auga feina gougua. Ke ega'ina auga, fei ega'ina oi emi laomai apala'i, ofu koa i'opo'i faagamiai kekae au'i aeikulai'i. Kai oi pako'a iifaga koa okapa, alomi felogai Deo eega olao. Ke baptismo ega'ina auga, Iesu

Kristo ega maunimueai, Deo oi kaniami eagamauga auga gouga. ²²Ke Iesu Kristo auga, e'agaukae elao ufai Deo kaina kainai eaguega. Ke agelo ke ufai isapu keafia au'i, ke ufai isapu ma'oai fou isa papagai kemia.

Deo Faugai Foagu

4 ¹Ega puo Iesu Kristo imaugai ekiekie kainai, oi isafa isa ekapaisa koa i'opoga mo opolaga foafia fofua foagu. Gome aufalao aga'o imaugai ekiekie aisama, laomai apala ikapa eapakipo. ²Ega'ina afegai isa eagu alogai, papiau aumauni kapa'ina apala'i emaani'i au'i fau'iai afaeagu. Kai Deo ega logoai kapa'ina anina eani auga faugai ageagu. ³Gome oi ufainagai Deo akelogonia au'i kapa'ina anina keani au'i mo kapa'i okapai'i emai pau emi kina ekainia. Ega'ina auga oi amage koa lao'i mai'i apala'i ipauma'i au'i, ke kapa apala'i omaani'i, ke oinuinu alogaina, ke omiamia oinuinu, ke ogefa a'oa'o akaiki'a ipauma okapaisa, ke pifoge deo'i oau afagaini'i, Deo alo ko'agai anina aeani au'i lao'i mai'i okapai'i. ⁴Ke pau laomai apala'i ega'ina kekapa'i au'i auga, oi fiakoa mo isa fou alomia, ega koa kapa'i apala'i ipauma'i ma'o alokapa'i auga eegai kekauai alogaina. Ke isa oi keifa apala peni alogainimi. ⁵Kai ega'ina papiau'i auga, Deo efua eague papiau keague au'i ke mae au'i fou e'i laomai apala afa agepeni'i auga maagai isa kapa'ina kekapa auga akeifafoua. ⁶Gome ega'ina kainai papiau isa'i kemae efua au'i isafa maa'iai Iifa Faunina Iesu fougua keinogonia. Ega koa Deo papiau aumauni imaaui'iai kapa'ina kekapaisa auga i'opoga mo afa fepeni'i kai lalau'i auga, Deo maagai Deo ega aguai fekeagu eoma.

⁷Kai pau kapa ma'oai fekefua laa'i fekemia auga kina emai kainagai. Ega puo oi alomi fo'ima felo, ke opolami felogai foagu. Ega koa oi fomegamega fekaina. ⁸Ke ega'ina laagai auga, oi alomi ko'agai aga'o aga'o animi foani alogaina. Gome oi alomi ko'agai animi agoani koa aisama, ega'ina laoga mainai papiau oi eemiai laomai apala'i ma'o kekapa'i au'i agemoka'i ago'agegeaini'i. ⁹Ke aga'o aga'o foifa kokoimi kai ega'ina agokapa alogai foloifa mugumugu. ¹⁰Ke aga'o aga'o Deo eegai pipeni i'oi'i i'oi'i oafii'i au'i pinauga felo auga koa i'opomi fomia, Deo ega gafegafe akaiki'a pipeni'i ega'ina fopapinaugani'i aga'o aga'o fopalagainimi. ¹¹Ke aufalao aga'o enini'ani koa aisama, isa Deo ega iifa eifafoua auga koa i'opoga fenini'ani. Ke aufalao aga'o papiau epalagaini'i koa aisama, isa Deo kapula epipeni auga kapulagai papiau fepalagaini'i. Ega koa kapa ma'oai agekapa'i alogai, Iesu Kristo faagagai papiau ma'oai Deo mo fekeau afagaina. Ke papiau Deo ega'ina auga au akaiki'a fekepamia ke isapu gome auga fekepamia aoniamo. Amen.

Kristiano Papiaumi Omia Kainai Okiekie

¹²Ekefa'auagai, oi i'opo kiekie'i akaiki'a'i oafi'i aisama, ega'ina auga kapa mama'i koa i'opo'i folopamia'i folokauai alogaina. ¹³Kai Iesu Kristo

ekiekie auga kiekiegai oi isafa okiekie auga alogama fopa'aua. Ega koa isa ega isapu ke eaea akaiki'a agepafokia aisama, oi alomi alogama fepogu laoma. ¹⁴Ke Iesu Kristo aka puogai papiau oi akeifa apala penimi koa aisama, oi auga Deo eegai kapa felo'i oafi'i aumi. Gome Deo ega Spiritu, isapu ke eaea akaiki'a gome auga oi alomia eague. ¹⁵Kai oi okiekie koa aisama, oi auau aumi, o painao aumi, o kelele akaiki'a'i i'oi'i i'oi'i ma'oi, o aufalao aga'o ago okaina puogai folokiekie. ¹⁶Kai oi Kristiano omia kainai okiekie koa aisama folomeagai. Kai oi Iesu Kristo aka oafiia kainai, Deo foau afagaina. ¹⁷Gome Deo papiau e'i laomai felo, o apala afa agepeni'i auga, kina e'ina efua. Ke ega'ina auga Deo ega papiau au'i faaga'iai age'ina. Ke Deo i'a faaga'aisai age'ina a'a laomai felo, o apala afa agepeni'a koa aisama, papiau Deo ega Iifa Faunina kainai akepea au'i auga faaga'iai kapa'ina agemia? ¹⁸Ega'ina auga Deo ega iifa pukagai eifania koa i'opoga:

“Deo papiau alo'i opaina au'i kania'i feagamauga auga e'inoka koa aisama,
 papiau Deo maagai alo'i opaina laa'i au'i,
 ke laomai apala'i kekapa'i au'i auga faaga'iai kapa'ina agemia?”

Proverbs 11:31

¹⁹Ega puo kai mo Deo ega logoai kekiekie au'i auga laomai felo mo fekekapa faefuafua. Ke ega'ina akekapa alogai, isa e'i agu maunina isa Epagama'i Auga, ke e'i pako'a eegai akeoge agekaina auga imagai fekeogeaua.

Iifi E'a Au'i Akaiki'a'i Ke Au Agu'a'i Fou Fou'i

5 ¹Ke lau oi epomia iifi e'a au akaiki'a'i au'i koa i'opo'i iifi e'a au akaiki'au aga'o, ke Iesu Kristo i'a fau'aisai ekiekie auga foug ko'a mo laifafoua au. Ke lau isafa isa agemai ega isapu, ke eaea akaiki'a fou agepafokia aisama, lau isa fou kai'alao ega'ina isapuga agaafia. Lau oi iifi e'a au akaiki'ami aumi lagoinimi: ²Oi sipi i'ima au'i koa fomia, Deo ega papiau sipi koa i'opo'i fou oague au'i fo'ima felo'i. Kai ega'ina agokapa alogai, oi fokapa puogai folokapa kai, Deo anina eani oi alomia anina oani puogai fokapa eoma koa i'opoga mo fokapa. Ke ega'ina alogai moni folomogemoge laina kai, alomi ko'agai papiau fopalagaini'i. ³Ke Deo oi papiau kapa'i epeniimi fo'ima'i eoma auga pinaugaga fokapa felo kai, oi ifomi mo emi isapuai ega'ina papiau'i fololopialaini'i. Ke oi isa kapa'ina fekekapa auga fopakina'i fekekapa. ⁴Ke Sipi I'ima'i Lopiaga auga ageapafoki aisama, isa oi kin kania'iai kraon keoge auga koa i'opoga iisa felo ipauma, isapuga ke eaea akaiki'a laa'i afaemia auga agepenimi.

⁵Ke oi au agu'ami aumi isafa, oi iifi e'a au akaiki'a'i au'i aina'i foafia. Ke oi ma'oi auga ifomi e'elemi fopamiaimi laoga maina auga foafi inokania, papiau aga'o aga'o ee'iai fokapa. Gome

“Deo kaisau ifo'i au akaiki'a'i kepamia'i au'i ee'iai eapa emuni.
Kai kaisau ifo'i e'ele'i kepamia'i au'i ega gafegafe akaiki'a epeni'i.”

Proverbs 3:34

⁶Ega puo Deo ima isapuga akaiki'a papagai auga oi ifomi e'elemei amopamiaimi. Ega koa kina agekaina aisama, Isa oi ageafiakaemi au akaiki'ami agepamiaimi. ⁷Ke Deo oi eopopolainimi puo, oi emi opopo ma'oi amopiuni'i Isa eega kegalao.

⁸Ke oi ifomi fo'ima feloimi, ke maami fekiakae foagu. Gome oi emi ou auga tiapolo laion koa eagaga epea aisoge papiau aga'o ekapuga gakogopa eoma. ⁹Kai oi emi pako'ai foapa kapula kai isa foumakalaina. Gome agofa'ai oi aami akimi Kristiano au'i oi kiekie alo'iai okoko au'i i'opo'i mo isa alo'iai kekoko auga ologo.

¹⁰Ke Deo gafegafe ma'oi inagome auga, Iesu Kristo faagagai oi eifanimi, Isa ega isapu, ke eaea akaiki'a fou akeka aoniamo auga foafia eoma. Ke oi kina pika koa mo agokiekie afegai, Isa ifo oi emi kiekie eegai agepapealaimi. Ke Isa oi emi pako'ai agepakapulanimi afololao afolomai, ke emi pako'a agoafiapia. ¹¹Deo ega'ina auga, isapu akaiki'a inagome auga fopamia aoniamo. Amen.

Pamego Fua

¹²Ke malele i'ina ofola'oga mo auga, Silas lau lapako'ania ke akiu koa lapamia auga epalagainiau lapapua eemi efai. Ega koa lau oi magogo kapula fapenimi, ke i'ina iifaga auga Deo ega gafegafe akaiki'a ko'a ipauma auga faifafoua laoma. Deo ega gafegafe ega'ina alogai foapa inoka.

¹³Ke Babilon agogai iifi e'a aga'o, Deo oi fou kaimialao ekinanimi auga ega pamego iifa'i oi eemiai eulaisa. Ke Mako lau gau koa i'opoga lapamia auga isafa ega pamego iifa'i oi eemiai eulaisa. ¹⁴Ke alomi ko'agai aga'o aga'o animi oani auga laoga mainai, aga'o aga'o fopamegonimi.

Lau lamegamega ega koa Deo ega gagao, oi Iesu Kristo fou omia aumi ma'oi fepenimi laoma.